

preso in Piemonte, era capitano de li, homo di haver gran taja *etc.*

Fu posto, per li savij, che le do ultime decime al Monte novissimo e la meza tansa si pagi con arzenti fino 8 zorni *aliter* pagino senza don *solum* con 5 per 100 *etc.*, *ut in parte*.

Fu posto per li savij che li debitori di mezi fiti et sali pagino fino a di 25 con don di 10, poi con pena di 5 per 100. Presa.

Fu posto, per li savij: atento domino Hironimo Sovregnan refudoe esser colateral zeneral nostro, che atento domino Batajom Bataja, dia aver certi danari di la Signoria nostra et è homo pratico *etc.*, che 'l sia electo colateral zeneral con ducati 40 al mexe neti. Ave 38 di no et resto de sì, e fu presa.

Fu posto per li savij far in Friul una ordinanza di fanti la qual si chiami l'ordinanza di San Marco, soto 4 contestabeli, li qualli saranno notadi di sotto, quali habino per uno ducati 10 al mexe di provisiom, habino do caporali per uno con ducati 6 al mexe, i qual 4 contestabeli abino soto de sì fanti di Friul numero . . . *ut in parte*, e fu presa. Li contestabeli: Malfato da Padoa, Marco Coppo, Malatesta da Treviso, Alvise di Navi da Bressa. Fo presa.

Fu posto per i savij dar a domino Vitello Vitelli e domino Vicenzo di Naldo, qualli è sta presi da francesi et erano a nostro stipendio prima, homeni d'arme 50 per uno. *Item*, a domino Brazo, fo fiol dil conte Carlo Fortebrazo, cavali lizieri 25. Fu presa.

Fu posto per i savij ai ordeni sier Giacomo Gabriel, sier Marco Antonio Calbo e sier Vettor Capello, certa parte di uno Stephano di Antivari darli certi sali a Corfù, *videlicet* confirmata eri: 3 di no, 77 di sì.

Fu posto, per tutti i savij, che do padroni a l'arsenal debano star ogni di fermi in l'arsenal et atendien a far compir le galie bastarde, *ita* che per tutto questo mexe cinque ne habiamo. *Item*, che una volta a la setimana vadi uno savio dil consejo, uno di terra ferma e uno a li ordeni a l'arsenal a sollicitar le expeditiom et quello bisogna a la dita caxa, *ut in parte*. Ave 2 balote di no.

Fu posto, per i savij a terra ferma, atento domino Brazo al qual ozi è stà dato 25 balestrieri a cavallo, siehè ne babi 50 come è honesto, sier Antonio Grimani et sier Zorzi Emo savij dil consejo messe nulla avesse *imo* li 25 fosse revochati, et sier Zorzi Emo andò in renga e contradise dicendo non li merita *etc.* Li rispose sier Alvixe Pixani savio a terra ferma, e fe lezer le lettere scrive di Campo li provedadori zenerali laudando dar *etiam* conduta

al dito Brazo. Or sier Antonio Grimani si tolse zoso, et sier Zorzi Emo si tolse zoso di la prima e messe star sul preso. Andò le parte: 58 di l'Emo, 63 di savij terra ferma e fu presa.

Fu posto, per li savij tutti et ai ordeni, certa parte et ordini di la doana di mar *ut in ea*: 34 di no, 82 di sì, fu presa.

Fu posto, per sier Antonio Grimani, sier Piero Capello, sier Alvise da Molin, sier Zorzi Emo savij dil Consejo, che sier Jeronimo da Canal di sier Bernardin, atento in Po si à ben portato et fu mandato per il zeneral da sier Zuan Paulo Gradenigo in quella note quando segui il caso, el qual ritornò e armato fo su la sua galia, la qual venendo zoso fo sfondrà da li inimici, che per autorità de questo Consejo el debbi meter banche e armar una galia per mexi 6. Or sier Nicolò Trivixan savio a terra ferma contradise, li rispose sier Antonio Grimani, parlò poi sier Sabastian Zustinian el cavalier savio a terra ferma, poi sier Zorzi Emo, ultimo sier Giacomo Gabriel savio ai ordeni, dicendo li avogadori doveria tuor la pena, è cossa malla a meter queste stanpe perchè lui meterà tutti li altri sopracomiti erano in Po armato, *unde* sier Marin Morexini avogador messe pena a li savij non metessenò ditta parte per esser contra a le leze, *adeo* si tolseno zoso.

Fu posto, per i savij dil consejo e di terra ferma e sier Vettor Capello savio ai ordeni, mandar a scriver a sier Jeronimo Contarini provedador di l'armata è a Chioza, che quelle galie è li *videlicet* do bastarde, vedi si voleno restar dandoli sovention *ut in parte*, et promission andar in Fiandra poi 6 mexi primi, secondo li gradi e altre particolarità *ut in parte*. Sier Marco Antonio Calbo savio ai ordeni contradixè, dicendo è meglio le vegnino a disarmar perchè non è homeni suso, torano le sovention et vegnirano via *etc.* Li rispose sier Vettor Capello; poi parlò sier Andrea Bondimier camerlengo di comun, dicendo è stà a Chioza per devution a la Madonna et à visto le galie vuode de homeni, et perhò lauda la parte de farle vegnir a disarmar; et eussì andò le do parte: 24 di savij et il resto di do savij ai ordeni, in la qual introe sier Francesco Nani el consier e sier Francesco Foscarei el savio a terra ferma.

A di 13 da matina in Colegio vene domino Batajom Bataja electo colateral zeneral e accettò volentieri, dicendo la Signoria vederà chome si porterà *etc.* Et fo ordinato darli danari poi disnar et vadi subito in Campo. *Item*, suo fratello Batagin, qual à 100 balestrieri a cavallo et era sul Polesene